



*Kamis, 15 April 2021*

**Ogen: Jeremia 52:24-34**



**Lantai Medolat**



**M**edolat ras mehaga jadi perayaken simbelin ibas kegeluhenta. Kedolaten ras kehagan enda labo itentukan kebayaken ras erta bagepe pangkat si lit ibas manusia. Megati sibelasken, medolat kal dagingna, mehaga kal. Ntah pe enggo bene dolat dagingna, ninta ka. Erbage-bage sierbahan dolat e bene, lanai tading ibas ia. Banci saja erkiteken pinakit, perbahanen si ncedai kalak sinterem ras erbage sidebanna.

Kalak Juda si enggo talu pe iangkut ku Babil, ertahap-tahap ibabana ku pembuangan. Imam si mbelin ras piga-piga kalak nari si erdahin i rumah Pertoton itangkap. Deba mate ibunuh ibas paksa raja Nebukadneser. Bage me kecibal kalak Juda ipembuangan tapi kenca raja Babilon eme Emil Merodak icidahkenna kiniulinna kempak raja Juda eme Joyakim, ipedaratna ibas penjara nari, iberena pangkat simbelin, ipekena-kenana kidekah umur geluhna. Amin enda inanamina selaku raja tapi sebage sada bangsa ras raja enggo me bene dolatna, lanai medolat, kuasana terbatas.

Bageme jadi ibas kegeluhen manusia, kebebasan, nggeluh i negerina jine e sada kedolaten si mbelin. Kuasana amin kitik pe tapi ncidahkan maka ia jine ngaturken kerinana alu sura-sura ras kiniulin siibabana. Labo terjeng gelar ntah boneka bagi sura-sura kalak, sibage labo lit sitik pe dolatna. Kedaulaten sekalak raja, eme Dibata simerekenca, icidahkenna nandangi rayatna dengen rayatna ngenanami ulih kepemimpinanna tapi eme silanai lit ibas raja Juda dengen rayatna. Metengetlah kita ibas kegeluhenta, banci jadi bene dolatta selaku ndehara, nande, kalak kristen sabab kita enggo ikuasai sura-sura doni si la mabai kegeluhen, kiniersadan nandangi jabu ntah pe perpulungenta. Enggo itaban ras iate-ate doni kita ibas sura-sura si la mehuli.